

Uunga siunnersuut:**Aningaasarsianit akileraarutit pillugit Inatsisartut inatsisaata allangortinnera pillugu
Inatsisartut inatsisaat**

(Suliffeqarfiit suliffeqarfissuarni imminut atasut akornanni akinik aalajangiineq pillugu pisut
ilaanni uppernarsaatinik ingerlaavartumik nassiussisarneq suliffeqarfinnullu
atorunnaarsitsinermi iluanaarutit akileraaruserneqartarnerat kiisalu pisortanit ikiorsiissutit
pillugit inatsit allangortinneqarnerisa kingunerisaattut aaqiinerit)

§ 1

Inatsisartut inatsisaanni nr. 12, 2. november 2006-imeersumi, ilaatigut Inatsisartut
inatsisaatigut nr. 2, 16. april 2007-imeersukkut, Inatsisartut inatsisaanni nr. 11, 15. november
2007-imeersukkut, Inatsisartut inatsisaanni nr. 9, 5. december 2008-meersukkut, Inatsisartut
inatsisaatigut nr. 3, 30. november 2009-meersukkut, Inatsisartut inatsisaanni nr. 9, 3.
december 2012-imeersukkut, Inatsisartut inatsisaatigut nr. 10, 29. november 2013-
imeersukkut, Inatsisartut inatsisaatigut nr. 7, 6. juni 2016-imeersukkut Inatsisartut
inatsisaatigut nr. 22, 28. november 2018-imeersukkut, Inatsisartut inatsisaanni nr. 41, 2.
december 2019-imeersukkut, kingullermillu Inatsisartut inatsisaanni nr. 11, 1. december
2021-meersukkut allangortinneqartumi imatut allanguisoqarpoq:

1. § 34, nr. 10, imatut oqaasertalerneqarpoq:

”10) pisortanit ikiuutisiat akuersissutigineqartut:

a) innarluuteqarnermut peqqissutimullu tapiissutit, utoqqalinersiutit pillugit Inatsisartut
inatsisaat malillugu aningaasatigut atugassalluunniit tunngavigalugit tapitut
ikiorsiissutigineqartut.

b) pisortat ikiorsiissutaat pillugit Inatsisartut inatsisaat malillugu ineqarnermut
ikiorsiissutinut tapiissutit, ataasiartumik pinartumik ikiuutisiatut, ataasiartumik
aningaasartuutinut ikiuutisiatut, nuunnermut ikiuutisiatut, ilisinermi aningaasartuutinut
akiliutinut ikiuutisiatut, angalanermut aningaasartuutinut akiliutinut ikiuutisiatut aamma
angerlarluni angalanermut ikiuutitit,

c) inissiani attartortittakkani ineqarnermut tapiissutit pillugit Inatsisartut inatsisaat malillugu
ineqarnermut tapiissutit,

d) meeqqat tapersorsorneqarnissaannut Inatsisartut inatsisaat malillugu meeqqanut
inuusuttunullu ikiorsiissutit,

e) inuit innarluutillit tapersorsorneqarnissaannut Inatsisartut inatsisaat malillugu inunnt
innarluutilinnut ikiorsiissutit,

f) siusinaartumik soraarnerussutisiat pillugit Inatsisartut inatsisaat malillugu immikkut
pisariaqartitanut matussutitut ataasiartumik ikiorsiissutit.”

2. § 36 b, imm. 1-imi, oqaaseqatigiit aappaattut ilanngunneqarpoq:

”Tamanna pillugu paasissutissat akileraaruseriffiup periuseq innersuussutaa atorlugu kingusinnerpaamik 15. juni elektroniskingorlugit nassiunneqassapput, takujulli akileraaruserinermik ingerlatsineq pillugu Inatsisartut inatsisaanni § 16. imm. 5.”

3. § 36 b, imm. 2, imatut oqaasertalerneqarpoq:

”*Imm. 2.* Akileraartussaataasooq nuusineranut aqunneqartunut akit piunasaqaatillu qanoq aalajangersarneqarnerannut allaganngorlugu uppersaasiussaaq toqqortaralugillu, takujulli imm. 4. Allaganngorlugu uppersaasat ukiup naatsorsuusiorfiusup atortuni pineqartup naanerani ukiuni tallimani isumannaatsumik toqqorneqassaaq. Allaganngorlugu uppersaasat imatut isikkoqassaaq illuatungeriit imminnut atanngitsut nuussinernik naammassinnissimasinnaanerani naapertorlugu akit piunasaqaatillu qanoq aalajangersarneqarnerannik nalilersuineranut tunngaviusinnaalluni. Nuusineranut aqunneqartunut annertussutsimikkut akulissutsimikkullu pingaaruteqanngitsunut allaganngorlugu uppersaasiortoqassanngilaq. Akileraartussaataasup akileraaruseriffiup qinnuiviginninneratigut uppersaasatit sivikinnerpaamik ullunik 60-inik piffissaqartitsilluni piffissarititap akileraaruseriffimmit aalajangerneqartup iluani nassiutissavai. Suliffeqarfiit suliffeqarfissuarni imminnut atasut taakkualuunniit peqatigalugit akileraaruserinermik ingerlatsineq pillugu Inatsisartut inatsisaanni § 16 imm. 3 malillugu nammineerluni nalunaarsuinerup tunniunniisaanut piffissarititap kingorna allaganngorlugu uppersaasatit kingusinnerpaamik ullut 60-it qaangiunneranni ingerlaavartumik tunniussisussaatainanerannut piunasaqaatit minnerpaaffissaat pillugit Naalakkersuisut malittarisassiorsinnaapput. Naalakkersuisut allaganngorlugu uppersaasatit imarisassaat akileraartussaataasullu ilaasa taamaallaat nuusineranut sukumiinerusumik taaneqartunut allaganngorlugu uppersaasiornissaat pillugu malittarisassiorsinnaapput.”

4. § 36 b, imm. 4, imatut oqaasertalerneqarpoq:

”*Imm. 4.* Akileraartussaataasooq nammineq imaluunniit suliffeqarfiit suliffeqarfissuarmut atasut peqatigalugit, tak. § 36 a, imm. 4, 250-it ataallugit sulisoqartoq ukiumut 125 mio. kr. ataallugit oqimaatigiissaaruteqartoq imaluunniit ukiumut 250 mio. kr. ataallugit kaaviiartitaqartoq taamaallaat ukununga akit piunasaqaatillu qanoq aalajangersarneqarnerannut allaganngorlugu uppersaasiussaaq toqqortaralugillu:

- 1) Inunnut pappiaqqatigullu inunnut nunani allaneersunut iliuutsinut nakkutigisaasunik nuussinernut, § 36 a, imm. 6 takuuk, Kalaallilu Nunaata naalagaaffiullu allap pineqartup akornanni marloqiusamik akileraartannginnissamut isumaqatigiissuteqarfiunngitsunut.
- 2) Iliuutsinut nakkutigisaasunut nunani allani aalajangersimasumik ingerlatsiveqartuni, takuuk § 36 a, imm. 6, Kalaallilu Nunaata naalagaaffiullu allap pineqartup akornanni marloqiusamik akileraartannginnissamut isumaqatigiissuteqarfiunngitsunut.
- 3) Iliuutsinut nakkutigisaasunut Kalaallit Nunaanni aalajangersimasumik ingerlatsiveqartuni, tassani akileraartussaataasooq, § 36 a, imm. 1, nr. 5 naapertorlugu naalagaaffimmi aallami Kalaallit Nunaannik marloqiusamik akileraartannginnissamik isumaqatigiissuteqanngitsumi angerlarsimaffeqarnera toqqammavissaatillugu.”

5. § 72 atorunnaarsinneqarpoq.

6. § 86-imi malillugu ilanngunneqarpoq:

”§ 86 a. Ingerlatseqatigiiffiit § 1-imi ilanngunneqartut § 86, imm. 2 aamma § 16 imm. 2 avataanni pisuni suliffeqarfimmik atorunnaarsitsinermi pissarsiaritinneqartut kommunimi ingerlatseqatigiiffiup angerlarsimaffiani akileraarutit procentiannik akileraartitsinermi procentip tamarmiusup aamma § 60 naapertorlugu ingerlatseqatigiiffinnik akileraartitsinermi procentip assigiinngissutaannik pissarsianit akileraarutit ilanngaaticissavaat. Ingerlatseqatigiiffiup akileraarutit akilersinneqartut akilissavai aammalu akileraaruseriffimmut § 88-imi malittarisassat malillugit tamanna pillugu nalunaaruteqassalluni. Akileraartussaataasup akileraarutit akilersinneqartut ingerlatseqatigiiffimmi piginneqataassutisnik pisinermi akiliutigineqartunut uppersarneqartunut atatinneqarsinnaasut annertussusaannut naleqqiullugit akileraaruseriffimmut qinnuteqarnikkut utertissinnaavai.

Imm. 2. Aningaasarsianik akileraarutaasussaataasunik naatsorsuinermi inuit tamakkiisumik akileraartussaataasut ingerlatseqatigiiffinnik nunani allani angerlarsimaffeqartuni, tassunga ilanngullugit Danmarkimi aamma Savalimmiuni atorunnaarsitsinermi pissarsiat ilanngullugit naatsorsussavaat. Aningaasarsiat akileraarutaasussaataasut suliffeqarfimmik atorunnaarsitsinermi s aamma ingerlatseqatigiiffimmi piginneqataassutisnik pisinermi akiliutigineqartut assigiinngissutaattut naatsorsorneqassapput. Kisiannili pissarsiat taamaallaat 65 procentii aningaasarsianut akileraarutaasussaataasunut ilanngullugit naatsorneqassapput. Ajunaarutit aningaasarsiani akileraarutaasussaataasuni ilanngaaticineqarsinnaanngillat. Akileraaruseriffiup akileraarutit naalagaaffinnut allanut, Danmarkimut imaluunniit Savalimmiunut akilerneqartut akileraarutinit ilanngaaticineqarnissaat § 69 malillugu akuerisinnaavaa.”

7. § 105, imm. 1, nr. 7 aamma 8, imatut oqaasertalerneqarput:

”7) nuussinerit aqunneqartut pillugit killilimmik uppersaasiortussaataaernermit piunasaqaatit eqqortinnerat pillugu eqqunngitsunik salloqittaalluniluunniit paasissutissiineq, tak. § 36 imm. 4, imaluunniit

8) nuussinerit aqunneqartut pillugit allaganngorlugu uppersaatinik § 36 b, imm. 2 malillugu aamma nunamit nunamut nalunaarutisnik suliarineqartussaataasunik piffissaq eqqorlugu tunniussinngitsoq, tak. § 36, imm. 6-12.”

§ 2

Inatsisartut inatsisaat ulloq 1. januar 2023 atuutilersinneqarpoq.

Imm. 2. Inatsisartut inatsisaat ukioq isertitaqarfiusoq 2023 aallarnerfigalugu ilanngullugulu atuutilissaaq.

Kalaallit Nunaanni Namminersorlutik Oqartussat, ulloq x. xx 2022

Naalakkersuisut Siulittaasuat